



# Program imunisasi sekolah – penerangan untuk ibu bapa

## Mengapa penting menjalani imunisasi?

Imunisasi melindungi kita daripada penyakit berjangkit yang membawa risiko tinggi penyakit serius, kurang upaya dan kematian. Vaksin mencetuskan tindak balas imun yang melindungi kita jika bertemu lagi penyakit itu di persekitaran.

Semua vaksin yang kini ada di Australia mesti lulus ujian keselamatan yang ketat sebelum dibenarkan. Vaksin dipantau berterusan tentang keselamatan dan keberkesanan. Baca lebih lanjut keselamatan vaksin serta kesan sampingan yang lumrah atau jarang berlaku: [healthywa.wa.gov.au/immunisation](http://healthywa.wa.gov.au/immunisation)

## Program imunisasi sekolah

Dalam program ini, anak anda ditawarkan vaksin percuma untuk melindunginya terhadap:

- difteria, tetanus, pertusis (batuk kokol) – 1 suntikan
- papilomavirus manusia (HPV) – 2 suntikan berselang sekurang-kurangnya 6 bulan. Penting anak anda mendapat kedua-dua dos untuk perlindungan terbaik

Penerangan lanjut tentang penyakit-penyakit ini dan vaksin untuk mencegahnya dapat dibaca di:

[healthywa.wa.gov.au/immunisation](http://healthywa.wa.gov.au/immunisation)

## Apa yang anda perlu lakukan

Pek izin imunisasi mengandungi penerangan dan borang izin.

Sebagai ibu bapa/penjaga, anda hendaklah:

- membaca borang izin dan helaian fakta vaksin terlampir dengan teliti, serta layari [healthywa.wa.gov.au/immunisation](http://healthywa.wa.gov.au/immunisation) atau hubungi jururawat sekolah untuk penerangan lanjut
- menandakan petak merah atau hijau dalam borang izin, untuk menyatakan vaksin mana yang anda izinkan dan mana yang tidak, dan menandatangani ruang berkenaan
- menyatakan dalam borang izin itu apa-apa masalah perubatan yang boleh menjejaskan reaksi anak anda terhadap imunisasi
- mengembalikan borang lengkap kepada sekolah, **walaupun jika menolak imunisasi.**

Anda mungkin dihubungi oleh jururawat jika mereka memerlukan maklumat lanjut.

**Pelajar dengan borang yang lengkap dan ditandatangani sahaja akan diberikan vaksin.**

Jika anak anda tidak menerima imunisasi pada hari berkenaan, anda akan dimaklumkan, dan pilihan imunisasi yang lain akan ditawarkan.

## Sebelum anak anda diberikan vaksin

Penyakit ringan dan biasa, seperti selesema disertai demam ringan, seharusnya tidak menangguhkan imunisasi. Namun, dalam hal tertentu, disyorkan supaya imunisasi ditunda atau tidak diberikan, kerana masalah perubatan. Maklumkan kepada jururawat imunisasi atau pihak sekolah jika anak anda:

- pernah mengalami reaksi teruk setelah imunisasi dahulu
- pernah mengalami alahan (alergi) teruk sehingga imunisasi tidak digalakkan
- telah menerima vaksin hidup sebulan lepas (misal, tuberkulosis, campak, demam kuning)
- telah menerima suntikan imunoglobulin atau pemindahan darah seluruh dalam masa tiga bulan lalu
- menghidap penyakit yang mengurangkan imuniti (misalnya, leukemia, kanser, HIV/AIDS) atau menjalani rawatan yang mengurangkan imuniti (misalnya, steroid seperti hidrokortison atau prednisolon, radioterapi, kemoterapi)
- hidup bersama orang yang menghidap penyakit yang mengurangkan imuniti atau menjalani rawatan yang mengurangkan imuniti
- tidak sihat pada masa imunisasi itu.

## Rekod imunisasi

Setelah imunisasi, pelajar akan menerima rekod vaksin yang diterima.

Semua vaksin yang diberikan melalui program sekolah akan dicatatkan dalam Daftar Imunisasi Australia (AIR).

Di samping itu, imunisasi HPV dicatatkan dalam Daftar HPV Negara: [hpvregister.org.au](http://hpvregister.org.au)

## Hubungi

Central Immunisation Clinic (Klinik Imunisasi Pusat)  
Tel: 9321 1312, 8.30pagi– 4.30ptg hari kerja

Doktor setempat anda

Pusat kesihatan masyarakat, hospital, atau unit kesihatan awam setempat

[healthywa.wa.gov.au/publichealthunits](http://healthywa.wa.gov.au/publichealthunits)

*healthdirect Australia*

Telefon: 1800 022 222

## Penerangan lanjut

Jabatan Kesihatan (Department of Health)

[healthywa.wa.gov.au/immunisation](http://healthywa.wa.gov.au/immunisation)

Immunise Australia Program (Program Imunisasi)

1800 671 811 atau [immunise.health.gov.au](http://immunise.health.gov.au)

## Penjagaan setelah imunisasi

Tempat suntikan mungkin merah dan bengkak – tekapkan kain lembap yang dingin.

Mungkin ada rasa sakit, demam, sakit kepala atau keletihan. Jika sakit kepala dan kesakitan, berikan paracetamol mengikut arahan label. Jika demam berterusan, berjumpalah doktor anda.

Layari [healthywa.wa.gov.au/immunisation](http://healthywa.wa.gov.au/immunisation) untuk penerangan lanjut tentang kesan sampingan yang lazim dan yang jarang berlaku terhadap vaksin.

Segera berjumpa doktor jika terdapat reaksi yang anda fikir serius atau tidak dijangka.

Semua pembekal imunisasi WA wajib melaporkan reaksi buruk setelah imunisasi. Ibu bapa juga boleh melaporkan kebimbangan tentang reaksi serius setelah imunisasi, di [wavvs.health.wa.gov.au](http://wavvs.health.wa.gov.au), atau menelefon 9321 1312, Klinik Imunisasi Pusat.



Dokumen ini boleh disediakan dalam format alternatif untuk orang kurang upaya.

Diterbitkan oleh Communicable Disease Control Directorate  
© Department of Health 2020

Hak cipta bagi bahan ini dimiliki oleh Negeri Australia Barat kecuali dinyatakan sebaliknya. Selain urusan adil untuk kajian, penyelidikan, kritikan atau ulasan perseorangan, sebagaimana dibenarkan di bawah peruntukan *Copyright Act 1968*, dilarang menerbitkan semula atau menggunakan semula mana-mana bahagian bahan ini untuk apa-apa tujuan tanpa kebenaran bertulis Negeri Australia Barat.